

養知書屋文集

養知書屋文集卷二十

湘陰郭嵩焘筠仙著

廣西布政使江公神道碑銘

公諱忠濬字達川新甯汀氏自其祖若父皆有名德不仕兄忠烈公忠源以舉人揀選知縣知天下之亂必起廣西新甯邊衝首受禍道其鄉人爲圍保陰以兵法部勒馳驟再平雷再浩李沅發之亂以能兵聞天下而公及其弟壯節公幼陶觀察亦因以起其家壯節自始用兵廣西從忠烈公幼陶別起一軍並精悍耐戰名江家軍公守團練保鄉里不樂立功規進取忠烈公顧獨謂

公才沈毅當事任自以不能及咸豐三年忠烈公以安  
徽巡撫保廬州賊環集公急募兵與劉武慎公馳援至  
則城圍已合連戰不得達頃之城陷忠烈公死公求得  
遺骸令劉公護喪歸自誓與賊倅命廬州曰城不復吾  
不歸矣又二年竟從克復廬州先是忠烈公殉難廬州  
詔賞公知州屢以破賊功保知府 賞花翎至  
是歎曰吾以援廬來廬州復卽吾事畢解兵歸七年再  
募勇援廣西連克興安靈州及平樂府以達桂林時諸  
降將屯踞省城驕悍剽殺百姓不敢問白標者尤暴亂  
公受密檄馳入城白標方擁眾出驟掩執之斬以徇並

其眾殲焉諸軍聞者皆憚服無敢囂擢道員加按察使銜逾年石達開竄湖南掠寶慶府而西公與劉武慎皆在籍拒戰新甯武岡之交比有功同治元年詔署安徽布政使明年授四川布政使四川號雄富侈靡承大亂死亡之餘抉剔拊摩革靡以儉化梗以和蜀民大安調廣西布政使公稔知廣西錢法之敝言之巡撫蘇公不能用及他事應興革者詰難辨爭持益力巡撫嗛焉遂以內召再引疾歸公開豁練達而持重寡言笑人莫測其喜慍揣事料敵神明內斷緩急輕重悉稱權量尤精習吏事明條謹法持以端平不矜苛察不尙糾劾可云

賢者而使行未達其志澤未盈其量將非所遭遇然耶  
公生於某年月日卒於某年月日年五十有九配劉夫  
人先公卒子五人孝椿候選知府出嗣忠烈公孝模廣  
東候補道孝樸候選直隸州知州孝植中書科中書孝  
根候選州吏目女二人一適雲貴總督劉武愼公長子  
涼州府知府思詢一適記名總兵李輔朝次子順薰葬  
邑東鄉侯家寨十有八年矣其子孝樸來請曰先公之  
葬羅舍人文實志其墓而神道碑至今未立於禮有闕  
焉先忠烈公之友今存者惟公能知先人家世行誼敢  
請文揭之墓道以彰先人之績昭示來茲遂爲銘曰

桓桓忠烈道揚貔虎附鄂交腓以踵前武公之始出淝  
廬在圍援戈阻前疇與騰飛悍壘蒙塗崩墉仡仡兄危  
鼎鎧終投一沸盤環盪決搏擊風雷傅城不及神死心  
摧終其事功有聞天下始焉一注誰辨金瓦解胄橐弓  
屏翰江淮再移西嶠甯馨所懷歸與求志未終方始孰  
云其年訥於甲子公才江河所施豈宏韜儲餘羸斂此  
微名夫彝之山發名啓迹於後萬年考績貞石

贈太子少保席公神道碑銘

公諱寶田字研鄉姓席氏先世自明由江西蒞官東安  
占籍爲東安人始冠補縣學生行學獄麓書院與劉武

慎公同志相切劘會廣西寇起踞金陵劉公從江忠烈公以戰功顯名江皖間後劉公自起一軍援江西召公參軍事累功保同知直隸州咸豐九年石達開掠永州西趨寶慶眾數十萬連戰武岡新甯披賊勢寶慶之圍以解擢知府 賞戴花翎湖南巡撫駱文忠公檄公募千人備邊防號精健營廣東賊犯郴州桂陽金陵踞賊又數分兵犯江西往來馳擊數殄賊有功擢道員加按察使銜同治二年賊黃文金號黃老虎躡江西眾十餘萬江誠恪公忠義率諸軍赴援公副之數月江西肅清曾文正公檄調入皖援青陽誠恪公急馳復青陽城

以勞卒公更領其軍累功以按察使

記名加布政

使銜明年

賞業鏗額巴圖魯名號已而李世賢汪

海洋挾賊數十萬趨江西公迎擊白沙關與相持

朝

廷以賊勢注江西命福建提督楊公督辦江西軍務劾

公援南豐遲延奪按察使降補知府而公實已力戰崇

仁宜黃金谿梟其精銳賊創甚南遯又躡之甯都會大

軍克金陵賊數萬擁洪秀全于福瑱由開化玉山走瀘

溪公急回軍扼之新城賊聞卽走遯日夜窮追至石城

楊家牌危崖削立路紆阻日且暮軍止不進公怒曰寇

窮且困可掩而擒也汪海洋踞瑞金咫尺耳縱使合爲

患必烈斬前鋒一人以徇卽夜度嶺嶺盡見炊煙四起  
薄擊之賊駭顧散走擒其渠酋數十人洪福瑱竄逸部  
將周家貞追得賊驚呼曰此小天王也捷聞

詔復原官加雲騎尉世職

賞黃馬褂時汪海洋方

由瑞金趨石城迎福瑱未至而福瑱爲虜所部數萬人  
皆潰海洋奪氣趨鎮平公自平遠邀擊截降萬四千人  
急趨信豐扼鐵石嶺邀賊賊果由龍南迤邐至據險擊  
之又降二萬人賊趨和平陷嘉應州江西巡撫劉公奏  
公江西戰功第一得旨以布政司記名題奏

賞三代一品封典左文襄公旋克復嘉應州公以賊平

請解兵終養是時貴州苗亂二十年劫掠州縣頑民習  
教者坌起應之有白教黃敎紅敎之分皆假天主爲名  
勢張甚湖南布政使兆琛屯鎮筰資防勦久無功而黔  
餉一取之湖南公私困憊會劉公岷巡撫湖南公故劉  
公提學湖南所得士也素知公檄募萬人援黔悉劾罷  
諸將獨留李公元度一軍會辦至則度荆竹園爲苗敎  
巢藪地險固破荆竹園而後勦撫有可施察北岡地稍  
平可乘而入進逼之戰旬日奪其壘悉平其四十八砦  
進至台拱台拱苗最强右清江左鎮遠連爲掎角公策  
規復兩城卽台拱勢孤可下遣將榮維善出奇兵越山

襲清江連克鎮遠方合黃運昌軍會攻台拱過黃飄道  
狹苗薄之運昌維善俱死急遣龔繼昌蘇元春分克岩  
門費谷諸砦遂破革夷復台拱城於是屢 賞御用  
珍物至是 賞頭品頂戴而諸悍苗悉眾踞九股河  
倚丹江凱里巉險爲守九股河者黑苗地也自明世阻  
兵約降而已未窮其境公乘銳督兵益急平其砦二百  
數十所連克丹江凱里於是乾隆中所設六廳城皆服  
苗酋張朽迷踞雷公山會暑雨公親執桴鼓督戰諸將  
肉薄奪其砦張朽迷跳免而勢已窮不能軍數月捕得  
之苗疆平 賞騎都尉世職公貌中人沈毅寡言笑

目奕奕有威棱用兵規畫全局不輕出邀利乘危薄隙  
部勒堅忍不可挫撓駕使才雋程量尺寸必盡其用自  
其用兵數百戰未嘗敗衄而平苗功最鉅自漢西南蠻  
濡化內屬其種負山爲阻在黔楚者曰苗種最繁爲亂  
亦最甚明設土司經紀之畔服相仍未有衰止 國朝  
乾隆嘉慶數十年間大舉深入殲竭兵力終以改土歸  
流臣畜長養亂是用弭至道光之季又數十年矣撫馭  
失宜垢釁叢生姦民骯法窟穴其中相獎爲亂黔西苗  
竝起剽掠城邑滋蔓數百里故所營建地盡還爲苗西  
南邊防日棘連屯相持積二十年公審度形勢以知苗

情向背緩急摧擊剽悍落其牙角搜剔巖窟蛇伏猱升  
窮極荒梗縋兵四擊苗驚以爲神每平一砦旁砦降者  
推誠諭化示以信義苗民大歡言者謂國家席全盛  
之勢經營數十年易置將帥虔劉撻伐僅乃克之公以  
萬人蕩平苗砦數百斬刈者數萬撫綏安集又十餘萬  
黔西南大患以息湖南數百里邊疆帖然不知有兵公  
之功爲大旣克雷公山功垂成矣而公感瘴病風痺還  
軍施洞以龔繼昌蘇元春唐本有謝蘭階分領其軍指  
授方略擒其渠帥遂以訖功自公病歸又二十年冊建  
詁經書院蠲施族田及諸有益地方苟知焉必致於行

苟行焉必要於久恢奇自喜身負天下之重處鄉里益務發攢不以自弛其志曾祖際雲祖上錦並以公貴

贈光祿大夫父居正歲貢生 封光祿大夫妣皆

夫人以道光己丑歲某月某日生光緒十五年己丑歲

某月某日卒年六十一湖南巡撫以 聞 贈太

子少保事蹟宣付史館 詔湖南江西貴州建專祠

祀焉配魏夫人繼配萬夫人子五人曜衡縣學廩生鏞分部主事匯湘縣學附生啟驥啟驥葬所居武岡玉屏山之原公少貧出就學道經櫟社以爲常鄰嫗忽夢櫟神告言席生非常人旦暮過我幸爲置門屏蔽我嫗以

是奇公頗資給之其後姪子亦以從軍功階二品云銘曰

藉氏爲席原始自環曰廣曰衡漢晉之間光祿建成功績以起爰及闡文列名於史以功受爵寶徙湘西江右再徙莫究端倪公之初起亦以文學俯仰苴繖參稽管樂狂寇四淩丁時艱虞用提一旅以訖天誅黔苗失馴連三十稔地遐勢阻公計之審萬險羅胸膽駕虎貔自天下擊霆奮麟馳劙其梟頑馴良弭伏功燁截刈心存煦育世亂才興實資武功湘士莘莘迄雅揚風公提兩戈萬人辟易帷燈夜張沈酣篇籍未竟其施以贏其身

神祖名永來考貞珉

郭武壯公神道碑銘

公諱松林字子美姓郭氏其先江右人元至正時有官  
考功郎諱啓元者徙湖南之湘潭遂爲湘潭人世以資  
財雄鄉里至公父而貧公少氣高負奇讀書穎異尤健  
於力在學雄長其曹偶指揮部勒謹諱馳騁爲戲不樂  
章句之學久之益困奮曰是烏足發名成業聞今陝甘  
總督威毅伯曾公募勇長沙往應之從攻吉安復景德  
鎮克安慶陷陣有功曾公奇之俾長一軍每戰領所部  
以先累保參將 賞戴花翎及圍金陵曾文正公上

言上海殷富獨制一方宜與金陵掎角奏遣今大學士  
肅毅伯李公鎮撫曾公以公與程公學啟資李公以行  
屢克柘林及崑山無錫各城方是時諸將皆新起挾才  
負氣相角爭先以戰恥爲後於是松江常州鎮江皆下  
累功擢提督總兵福山 賞穿黃馬褂丁父憂

詔起視師公於時兼統七營爲大將矣而年始三十於  
諸將爲最少臨敵倉卒應機赴會進退可否取決於公  
既定蘇州連克浙江長興四安鎮安徽廣德州授福建  
提督 賞雲騎尉世職江南平餘寇由江西趨福建  
據漳州公由海道急馳至漳攻下之賊趨廣東奉閩浙

總督檄還公江蘇同治五年咸毅伯曾公巡撫湖北河南捻匪侵盜及湖北命公拒之屢克雲夢應城再從肅毅伯討賊山東擊斬賴汝洸張總愚河南寇悉平

賞騎都尉世職旋晉一等輕車都尉調補湖北提督以母羅太夫人憂歸服除再補湖北提督入觀而俄

羅斯立約反伊犁侵地輕重不得相持急朝廷憂兵改授直隸提督至則按行邊塞規畫形勢條奏練兵事宜謀遂更定營制矯而正之以率先天下樹重鎮於邊頃之病以光緒六年正月二十一日卒於位年四十有七

天子閔念其勞

贈卹有加

予謚武壯

勅諸所建功地立廟以祀其年十一月某日歸葬湘

潭九都三甲茅陂山莊之陽曾祖範字祖容光父縉修

三世皆以公貴贈光祿大夫建威將軍妣皆夫人配楊

夫人先公二年薨子七人人凱承襲一等輕車都尉承

舉候選道加三品銜人瑞人漳人洲人詔人直俱幼女

六人公魁奇瑋麗眉目如神氣矜喜勝好賓客梟盧飲

博玩弄笑侮而刻意從善見賢於人委已下之惟恐不

當意識拔諸將指使必得其任才否高下權衡銖兩具

見表裏而於爲義若飢渴推惠均仁存問親舊時其緩

急未嘗有毫髮計量也任湖北提督修襄陽江隄引江

水注之城隍使阻水爲險亦資其灌溉之利其於飢民無食者有振有卹襄陽民至今思之爲義莊贍其族罄所有田產五千餘畝建學育嬰恤嫠之法備具撫臣上其事於朝天子褒其義賜署書焉蓋公性闊達務施而才氣充然有餘於官於宗所在興事功規利久遠類如此始公在應城躡賊羅家集會大霧與大軍相失賊來益眾公弟副將芳鈔戰沒公率數十騎馳突爲賊所乘賊將望見公驚以爲神下馬拜迎問歸大營乎急扶攤以行軍中失大將所在擾亂莫知所爲而公已率降將數十人按轡以歸是時賊將多欲降者而

受成俄頃之間挫敗之餘則公神明精爽有以勸其慕而發其心也公於弟友愛尤至其季南軒亦累功保提督以病不仕狀公行實涕泣求銘其墓道者南軒也銘曰

文媯武敝與亂相靡乃假豪儔撥而正之不有其人雖聖曷施厥興四騰桓桓虎貔公起軍校奮塵絕迹搏膺大呼風雷辟易撇江蹂皖掀吳剽越訖功於齊偃師溟渤解鞬釋甲爲時豈多玉佩雍容投壘雅歌以施於官以效於家揚詡喚咻煦以惠和帝憂東藩畀之邊鎖公拜曰愈豈不在我簡料鈎伍周視保塚庶幾小憩於時

幸可奈何乎公命茲不延弛荷修塗曷云匪天銘碑紀  
閥彌億千年有徵吾文眎此新阡

誥授建威將軍王公神道碑銘

公諱永章字綬卿姓王氏湖南甯鄉縣人少孤負奇氣  
不樂就學羅忠節公始治兵長沙往投之每戰先登連  
克崇陽通城蒲圻爲隊長消攻湖口轉戰江西旋會師  
武昌羅忠節公卒從李忠武公戰望江東流銅陵克復  
舒城廬州比有功李忠武公敗三河君以隊長搏戰傷  
創甚歸會石達開竄湖南駱文忠公檄君開募章字營  
是時猶爲參將名未甚顯然在軍往往相與指目以爲

能戰駱文忠公召與語奇之公之別領一軍取進止自此始也石達開出沒楚境經年粵東西積匪相踵起君轉戰郴桂間蹙賊廣西之賀縣復其城保總兵又截擊石達開永明道州降其眾二萬人躡賊寶慶與相持綏靖之交攻克黔陽會同阨之龍山之紅巖四日賊死咋不得逞竄入蜀於時君之功尤多保提督先後 賞

戴花翎 賞振勇巴圖魯名號正一品封典竝以提督 記名簡放同治六年湖南巡撫劉公大發兵征貴州苗公獨當思南一路攻克大塊小塊逾年苗平而江華猺亂起以公節制諸軍兼籌勦撫於時以所部三

營駐防常德岳澧當西路之衝二十年有發則馳驅赴

敵罷卽歸防

天子念其勞屢賜文綺玉柄刀決拾

之屬兵部尙書彭公奉

命辦理廣東海防檄公以

所部從遂以勞卒於軍得

旨優敍

賜祭葬加

賞卹銀二百廩一子入監讀書先給六品頂戴公性沈

鶩寡言笑與人無周旋而推誠闢達未嘗有所疑忌自

始居卒伍及任爲將臨敵必先論功常退處於後遇有

調發得檄卽赴一不以疑難自阻與強敵相持警報沓

至羣疑子子公從容指揮常若有餘兩署永州鎮總兵

一署鎮筸鎮總兵一署湖南提督出入無儀仗一循在

軍之常身被數十創礮子如豆纍纍肌骨間氣血虧耗  
夜卧環兵爲守與人言忽若遺忘搏膺赴戰馳突無前  
當者辟易軍中嘗呼之王顚云君生於道光十年庚辰  
歲十二月初八日卒於光緒十一年己酉歲十月二十  
五日年五十有八曾祖修泰祖棨人考定昇並以君貴  
誥贈建威將軍妣皆一品夫人夫人周氏 誥  
贈榮祿大夫振榆之女妾蕭氏劉氏劉氏子八人廷謙  
廷俊周夫人出也長者廷誥藍翎縣丞廷贊廷謀廷楷  
廷模廷杰將以光緒十二年四月卜葬善化一都魯家  
園之原而屬嵩蠹銘其功揭之墓道乃爲銘曰

時危道昌勛哉桓桓盪滌難屯以厝之安公起自微材  
官蹶張萬夫俯仰橫出莫當一戰之勛羣躋節鍼君經  
百戰始窺津筏自鄂達皖蓐食踝趨衝城突陣癱瘓盈  
膚稅駕旋湘乃提一旅湔除戶闢以捍疆禦湘軍縱橫  
東南戈鋌獨專其功桑梓周旋東望滔滔海瑞狂獮旌  
麾所嚮星頽雨翳功施里域歌斯哭斯樹碑紀閥以永  
謳思

誥封光祿大夫劉府君神道碑銘

自曾文正公起鄉里討賊湘鄉奇偉非常之士爭自刮  
磨立功名肩相摩指相望而揚灘劉氏爲尤盛若雲貴

總督劉盡臣記名道劉峙衡其尤表表著聞者也晚乃得南雲瑞雲昆季其年資稍後與平金陵寇亂兵革亦稍息矣又從威毅伯曾公北涖燕晉攬盧龍形勝憑陵大江防海數千里當時諸宿將無幾存者南雲乃獨以武功顯其弟瑞雲觀察間歸告嵩齋曰先光祿公卒三年葬吾邑應溪金盆山之原而墓碑未立吾兄弟賴先人之蔭以幸有立而使先德闔而不章其奚以待考於後世非公莫爲之銘以表諸道昭示久永案狀公諱某字楚元曾祖某祖某父某世有名德而家故貧公憤曰儒而貧終不足發吾志事遂棄而爲賈家日饒終以失

學自懲艾督課其諸子益急瑞雲補縣學生會兵事起  
南雲請諸其父曰弟任讀必光吾宗兒幸從諸軍後赴  
國家之難遂起裨將累功開幕府江上盡諸兄弟皆  
起從殺賊立功公亦喜悉資以行曰兒輩發名成業以  
勤國事吾終知勤吾家於是益務爲善貧者振之急者  
周之鄉里忿爭不肯下者平之開善而窒惡講讓而戒  
貽立敦善堂置田三百畝鄉之貧無養死無斂皆取給  
焉修治福田橋路二十餘里建育嬰堂一以身任之山  
西大飢自家輸振一千金巡撫曾公上其事於朝

天子爲賜署書以旌其門南雲兄弟自以效尺寸之績

蒙被

國恩顯榮襄大一皆公之遺信乎其意之勤

而延之長非一日之積也公生於嘉慶十二年丁卯歲

二月二十七日卒於光緒八年壬午歲二月初一日年

七十有六夫人李氏子四人鎮湘候選同知卒於軍以

道員

賜卹連捷

記名布政使世襲騎都尉加

頭品頂戴蔚昌候選同知直隸州鴻年江西補用道加

三品銜女一人適邵陽候選從九品謝隆江孫四人曾

孫三人以連捷貴

封光祿大夫卽南雲也瑞雲將

赴官江西買石樹碑以表公之墓將使公之名與其所

以爲善於鄉既大旣光揭示無窮嵩叢承事而爲之文

且爲銘曰

江流盤盤是惟連道蔚生賢達天授宏造曾公之興如  
川在源萬水趨之瀆薄騰驁挈提魁士納之軍幕張弧  
揚麾出入鋒鍔公籍於市與時沈浮豈甘讓人車前八  
騶乃詔諸子急赴國難權衡重輕孰與絳灌佳哉鬱  
蕙若春載陽聲施所被車服旂常及公之生恢張門閥  
公日孜孜萬善之揭旣耄考終於時有聞穹碑大碣視  
此刻文

誥授榮祿大夫蕭公神道碑銘

公諱韶字屺山姓蕭氏世爲衡陽望族科名仕履著聲

前明 國朝析衡陽爲清泉遂爲清泉縣人其後數世  
稍衰微自君曾祖緯儒祖正元父耀祖三世皆不仕潛  
德闇行厚植其基公生四歲祖課以唐詩盡一帖能言  
其辭義見者皆曰蕭氏光啓有人選充辛酉科拔貢生  
朝考一等授小京官籤分工部虞衡司入貲爲員外  
郎改分刑部中丁卯科舉人光緒元年入直軍機充章  
京補直隸司員外郎遷安徽司郎中總辦秋審處保選  
御史補福建道監察御史充庚辰科武會試監試七年  
簡放廣州府遺缺知府補廣州府知府故事首府常簡  
才望守郡久以爲諳知地方事宜公始至大府奏公才

任繁劇廣州缺尤莫公宜兼飭赴任公上言 朝廷重  
親資選受命補遺缺非有積資而膺首選又不俟部覆  
急往踐職任何辭以解於人願畱省跋後命改署韶州  
府知府未滿三月以部檄就任廣州十一年擢湖北荆  
宜施道大府疏畱調補惠潮嘉道旋署廣東糧道又署  
廣東布政司凡在廣東七八年始終不出省城擢浙江  
按察司明年轉江西布政使會病輿就道病益甚僦居  
金陵數月卒公廉飭端謹終身無過言軼行見利常避  
若浼爲政持大體踔厲風發奮身赴之不知有利病禍  
福蒞官二十餘年所處皆要望綜勤職事無怠以玩在

軍機最稱慎密退直閉門研誦書史門以外不聞車馬聲其仕外以廣東歷年久仕蹟尤偉沙基洋人欲驅沿河居民數百戶拓地基大府重違其議公力持不可卒寢不行其後粵人焚毀沙基洋房捕三十餘人大府諭嚴訊公曰此皆無賴何待深訊要當推知其由耳今且舒徐以觀其實已而洋人自罷其議三十人者皆得釋法蘭西之擾閩或獻言延英律師借方略公力爭又或請蠲銀八十萬充軍餉任緝賭或請蠲銀二十萬開白鴿票局公皆力爭時需餉急大府尤苦公已皆大服始終信任事皆倚公辦卽有遷擢輒疏畱不忍其去其官

知府蠲置積穀十餘萬石清理獄訟扶掖學校日有孳  
孳官布政司曰藩司職在理財用人嚴財之出人剔弊  
爲先而道在無擾辨人之邪正不能不依律爲程道在  
無私其後按察浙江剔姦保良常若所患之切其身窮  
盡根株昭晰無疑不以人言輕重故其在官無赫赫之  
聲而人安其業事集其功利興弊除無有缺遺立身與  
人和夷溫雅惟恐於人有傷而皆信其素守凜然無敢  
干以私其去官士民扶老攜幼相送製衣繖以獻其卒  
也聞者相與歎息誦言其賢而悼其無年公生於道光  
九年己丑歲某月某日卒於光緒十四年己丑歲某月

某日年六十以其官 贈封其三代皆榮祿大夫妣  
皆一品夫人前夫人廖氏後夫人勞氏子四人邦愷邦  
憚邦憮幼者邦愷殤女五人長適侯選員外郎長沙易  
秉範次適監生衡陽劉興瀛次適戶部郎中舉人巴陵  
方朝榘四字湘鄉曾某五未字公弟某有賢聲始官京  
師家貧也任事其母泣官煩要司出納惟謹比卒奉其  
喪歸葬其鄉某原磬石墓道將銘以揭之而使言嵩巖  
曰湘人名德與兄習莫宿先生願有述也乃爲之銘曰  
元黃驥驥化敝民訛發難自粵激揚干戈東南敉定海  
氛繼爍變端紛紜飛喝揭戰公於其時委珮乘聰介身

羣呶坐鎮雍容方昕鼓徵集雋講藝狂犴在門曾不芥  
蒂參庭抗言羣顧驚疑載其清靜衢謳市綏事效顯章  
交聲引重超遷首塗回章轉輶名位已隆圻封已梯開  
藩自東中道顛隣歸喪故邱山川翕闢考德微文視此  
穹石

誥授光祿大夫劉勇介公神道碑銘

自曾文正公起鄉里視師削平寇亂一時奇偉傑特之  
才奮起立功名肩項相望而勇介劉公年最少儀容瑋  
麗神采奕然每戰搏膺大呼盪決馳突當者辟易他軍  
或多或少卻見結束端整奮矛直前相與指目曰此劉某也

則皆奮一軍倚以自壯同時湘潭壯武郭公與齊名而  
公之出稍先於壯武其沒又後壯武十年功尤多名尤  
顯公諱連捷字南雲湘鄉人家世儒者其族兄武烈公  
騰鴻領湘軍公以裨將從戰湖北有聲保千總巡撫胡  
文忠公壯其勇俾自領一軍時曾文正公駐南昌瑞臨  
諸郡皆陷武烈公援江西搏戰上高城下沒於軍公憤  
肉薄而登拔其城武烈公名將敢戰軍中失主帥奪氣  
公力自激揚氣益振曾文正公見謂公容貌舉止儒生  
也改保知縣會威毅伯曾公自起一軍薄吉安悉所部  
隸焉從克吉安保同知文正公駐軍祁門檄公攻太湖

擢知府克安慶功最保道員

賞果勇巴圖魯

名號自是轉戰廬江無爲含巢和州旋攻太平府晉按察使銜威毅伯策江南北諸城批賊勢略盡而賊踞金陵十年所憑厚號召四應但出不意搥金陵下之卽賊可滅功可成公奮請前行而金陵城守固驟不可拔李秀成以所部三十萬號百萬援金陵官軍固不滿三萬圍數重壘土列巨礮環攻發聲動天地穴地伏火當官軍營轟之公率死士捍營礮發卽伏稍間則乘其懈出擊令善聽者循聲知所穴處開而迎之殲其人圍四十六日計窮遯去時以無爲州通餉運公急率二千人突

出賊前扼城以守賊至敗之論功以按察使記名

加布政使銜再克巢縣含山和州奉

旨賞黃馬褂

江北事稍定乃謀合圍金陵約水師進克九洑洲斷賊接濟公力爭下關賊壘兼斷城援突礮火薄登賊死左右從者皆殞血濺衣不爲動卒奪其壘而賊援已絕逾年金陵平以布政使

記名簡放

賞頭品頂

戴給騎都尉世職庚辰威毅伯巡撫山西奏公駐防關外會俄夷構釁移屯山海關威毅伯由粵督改督江南而法夷據安南沿海戒嚴再起公任軍事父老望見相戒言此故少年將軍能殺賊者皆大憚以勞卒於江陰

軍次

上聞

贈太子少保

予謚勇介詔所

立功省分建專祠明年奉

旨圖形紫光閣所著書

曰臨陣心法

詔並宣付史館公機智警敏而貌深

湛恂恂若書生臨敵決勝精神倍出軍行迫險隘賊來  
益眾分軍四應從容指麾意常有餘軍中號曰神勇性  
孝友父課讀嚴公意不樂也獨喜孫吳兵法弟鴻年入  
學籍乃啓父曰弟固才也得以文學世其家兒當從

國家之難以自發名成業旣貴益務施濟延攬篤友朋  
之誼患難比依輸心吐臆人奮思效推惠均仁由其家  
以迨及其鄉使飢寒有備衣食有資武烈公卒家貧甚

賙之尤至日吾不敢忘所自公生於某年某月某日卒  
於光緒十三年七月二十日年五十有五曾祖某祖某  
父某皆以公貴    贈光祿大夫妣皆夫人妻某氏無

子以從兄子某爲嗣以某年某月某日葬某鄉某原其  
弟蔚昌鴻年立碑墓道表示無窮而嵩燾承事爲之銘  
銘曰

元會剝屯幹世以功文武憲章風動雲從公之初起因  
緣卽戎提戈奮飛造基自躬江淮狂獮其眾浩瀾縱橫  
洗蕩一搏千里披其城邑禳滌垢瘠大纛開張揚鱗佩  
纓始終兵事訖三十年年初及艾而命不延    天子

有詔悼忠表賢千齡萬載永護斯阡

誥封光祿大夫胡府君墓志銘

公諱達潛字季甫姓胡氏益陽人晚自號曰默希胡氏世讀書不顯公之父諱顯韶縣學生始以文章道義知名卒祀鄉賢有子四人公其季也長諱達源以進士第三人及第官詹事府少詹事至是胡氏乃貴盛而公年逾四十有六始以道光乙未恩科副榜與從子故太子太保文忠公林翼同舉於鄉慨然曰吾道如是矣終已不言仕進文忠公旣貴贈封公光祿大夫目公少訖老菲言厚行務自韜晦不矜技能與人交無

差等視之惟均更歷夷險榮悴豐約百變淡然若忘惟  
意之適衣服言語衍衍爾亦惟均文忠公位巡撫督湖  
北諸軍討賊以進退人才爲己任公親叔父遠近士爭  
輶其門至則延納之不以賢否異視汲引窮困無虛日  
久之所言多不讎至以相訾譽公一處之怡然始終無  
干其意縣有大興作若文廟書院及賓興典禮以諮詢  
曰於我乎任旣久詘於資工不時就裏諸富室以益之  
曰於我乎先費具授之所司一不問其出入盈縮蓋其  
視天下之事皆若可爲天下之人皆若可與款曲周旋  
獨使其心無所繫累以理於物而順於施豈莊生所謂

其德天全者耶其意念常有餘而年壽以有延君子以  
是爲宜也公生以乾隆五十五年四月二十六日卒以  
同治十年二月初五日年八十有三夫人陳氏子保翼  
貴州仁懷縣知縣早卒翼同知銜候選知縣出後兄  
達灝孫之鼎曾孫學璘斐翼卜以其卒之月甲申葬公  
金塘鄉伏虎原匱嵩燾爲之銘銘曰

奚求於人摩頂決履輪敝馬瘡不濡其軌其生劫劫在  
心冲夷視世一塵身與逶迤無榮事功所得者壽方諸  
貴顯獨爲恆久有峩者邱包山絡岡埋我銘辭以詔茫

誥封通奉大夫黃府君墓志銘

君諱世綬字翰青一字紫卿姓黃氏長沙人其少嘗試於有司矣困於無資用以進喟然曰學非爲貧也貧而求濟於學如弗學也則棄而爲賈久之益饒卒用其資以致諸子於學曰勉成吾之志而其長子廷瓊遂以進士起家顯名於時廷瓊歷官南匯婁縣長洲知縣當江南繁富之地祿入有餘宜致養於官君曰江南賦繁重官民交敝吾夙夜憂之無更以我累也吾家居衣食不匱但期以令名貽我卽養我多矣使至輒罷遣之故廷瓊在仕十年求一養君於官不可不得已而廷瓊以太夫

人憂歸而粵寇起天下大亂今相國曾公奉

命治

鄉兵討賊廷瓊轉餉佐軍君一以家事自任子孫蒸然爲舉人及博士弟子員者相環也益日夜督之學不勞以事年七十有一矣猶彊步善飲食接待賓客勤而不倦同治六年丁卯歲八月二十日疾遂卒君端慤明練遇事常若有餘與人溫然雖卑幼必謹於禮而嚴重持大體卽有不可一斷以義無少依回其赴鄉里之急若飢渴飲食之切於其身也勞問饋遺徒步往來油然樂之初以廷瓊官長洲縣知縣封文林郎其後廷瓊以籌餉功擢南甯府知府再封朝議大夫及廷瓊

以道員候補廣西加按察使銜晉

封通奉大夫夫

人楊氏淑慎有禮法能佐君以興起其家先君卒十八年至是合葬沙塘衝鳳形山之陽其兆域君所自定也祖諱明萬考諱員珍竝以廷瓊貴贈通奉大夫妣

皆夫人子男五人長卽廷瓊次廷瑛附貢生早卒廷瑢亦早卒廷瑞廩貢生候選訓導廷理候選從九女二人長適劉昌荃次魏名彝孫十一人傳禧戊午科舉人候選知縣加同知銜傳祁傳禮傳裕竝邑庠生殤者二人餘皆幼曾孫三人銘曰

在昔乙巳北歸楊舲肩隨嗣君旅拜於庭涉仕來還予

髮已星結廬相望雨岫煙汀蚤暮追從諷律稽經自始  
迨終二十三齡酡顏溫笑發言猶馨一夕遽寢歸神沖  
冥夫人從穸式是儀刑考德徵詞來諗吾銘

誥封朝議大夫張府君墓誌銘

君諱啟鵬字幼溟一字蔗泉姓張氏先世有宗可者元  
至正間自江西豐城縣徙居長沙之赤山坪以文學科  
第世其家爲長沙望族世稱赤山張氏曾祖尙交縣學  
生祖峻國子監生父再英嘉慶丙辰科進士廣東海豐  
縣知縣有子四人曰延詔陝西洋縣縣丞署西鄉縣知  
縣曰延載縣學生曰沄咸豐癸丑科進士掌山西道監

察御史君其季也君生時海豐君有事廣州移家其縣之麗江書院君以是誕焉因自號麗江居士少讀書駿博精敏世其家學尤喜深湛之思一字之未瑩一義之未融鍥焉而弗舍也縱觀周秦子書採而翫之齊之以度數通之以訓詁故其爲文縋幽鑿險百怪森列而辭與理副洪纖應和粹然一軌於正舉乙未科鄉試歷游齊魯皖豫吳越豫章之境而居鄂尤久所至盡交其賢豪長者考覽山川形勝增助氣勢而文益奇志亦益遠咸豐初選授永明縣學訓導時廣西寇發永明當富陽灌陽恭城三縣之衝賊出沒剽疾刀戟摩戛相聞君至

卽議戰守方略相地勢扼邑南龍虎關爲守連拒賊有功保知縣已而賊大至掩關入永明城小而敝無守備儲峙民撤走且盡君坐齋閣不爲動左右持之急君曰頃乞援周領軍聞警必至豈宜空城以委之吾在則城爲有繫也周領軍者副將周雲耀時駐軍江華勇敢負意氣移時果至賊反出其後圍攻三日食盡周君與君計與坐斃無甯一搏戰戰幸完君走郡乞援與糧是猶有生望也遂出戰周君所部三百人賊數千迎擊周君死之君以閒馳郡白狀卒得援兵復其城君適以籌餉功開缺以同知用方是時湖南援師四出壞境所接無

完士獨用課佔轉餉衡州當兩粵之衝事尤劇部使者  
陽湖惲公知君賢又於衡習也屬君以衡州釐務十餘  
年剔弊摘姦導以廉勤訖賊之平轉餉累鉅萬民商翕  
然無怨者而君顧自疚曰爲軍食病民久矣大亂幸平  
吾得敝衣粗食以終餘年無爲久與螭蛇也卽自免去  
君性溫純與人交曲折盡其意無間始終厚於名賢碩  
德以求廣益亦用以資益於人其意勤勤常若有餘遇  
事規攬大局求遂所安未嘗避難自沮亦不爲喜事立  
名示人以圭棱故其在官與人更歷常變險夷處之怡  
然不見其有喜怒欣戚之色也將非讀書養性有得於

道者邪君生於嘉慶十二年三月二十二日卒於光緒九年二月二十九日年七十有八夫人章氏繼夫人許氏子四人祖同同治壬戌並補行咸豐己未 恩科

舉人常甯縣敎諭分省補用知府環同府學生候選州同知蚤卒百熙同治甲戌科進士翰林院編修己卯科山東副考官山東學政覲同縣學生出後其兄法女三人所著周易通義三卷心言三卷讀書記八卷梅墅文鈔二卷詩鈔十卷友石詞三卷無垢靜室時藝四卷續編一卷將以其卒之三年二月三日葬君善化六都葉家灣之原寅山申向兼艮坤以嵩燾知君久屬爲銘其

墓之文銘曰

浮邱湯君著書名子開蕩乾坤雄伏一世見君心言氣  
輸神移法言中說斯乃兼之尤於比耦閥深雋朗百數  
十年隻立無兩謂當以文潤色皇衢卑棲一學出入戈  
殳獨畀之年以觀其微使車赤帷光施有耀不於其躬  
於其子孫千齡萬禡視此高遼

貤封承德郎黃君墓志銘

君諱大鐘字東序龍山黃氏父曰之翰有子三人而君  
居長家故饑自君兄弟始知學七歲讀書家塾師偶出  
羣從奔趨以嬉君獨鍵戶母自牖窺之則長跪坐口哺

喃自搥擊有聲母驚問故曰適讀書久未熟自懃既出就外傳間遣僕歸祖鴻禩爲具酒食溫語丁甯君聞泣曰此以吾讀書故詔其勤我耳益日夜自砥於學年二十補邑庠生龍山邊邑少藏書學官弟子不能舉經史君求得之伏讀以思治禮經歎曰人道由此立矣入而承事其親出而應人接物悉準而行焉父之翰恢奇多大略而不知書君每侍演說古今人物事實父大喜以是通知史事居父憂考求喪制逾期猶衣衰終喪疏食居外其後處期功喪不釋服不櫛髮以爲常從母王氏卒已異居矣守喪次兩月弔者至哭拜喪服不講久矣

君蓋尤嚴焉龍山知有喪禮自君始所從學舒君老而貧君爲經理其家其卒也親視斂營葬里有鬻妻者君贖還之旣又念曰是無力自存卽還終鬻耳召使傭力其家厚資給之養其子以有成道光十五年邑大旱疫作君出米振鄉人躬自拊循人謂疫氣宜少避君曰死生命也何害人知君篤行而君固尤以幹濟自憲邑南江當辰水上游水悍疾每歲盛漲常溺人君弟大鉞議築石橋君曰石力不敵水必圮不如多置渡船水潦降則聚船爲浮梁大鉞不從再建再圮卒從君議嘗言讀書須達識時務王安石以所學誤天下非但經術疏也

亦由不通知世務又言范文正以天下爲己任卽程子  
宇宙內事皆吾分內事士須以此自命在鄉黨則庇及  
鄉黨在家國天下則庇及家國天下平居以立社倉置  
義莊積書教族子弟爲意病且卒猶諱諱以詔其子俾  
卒成之夫人熊氏有智略田山鉅細皆綜知之人無敢  
欺君嘗與諸子夜深擁火論古今文章得失夫人笑曰  
若言偉矣吾不能知其深然恐無益世用益多論古人  
持身涉世成法以求有益君歎曰歐陽公固言之文章  
止於潤身政事可以及物卽此義也君以弟大鐘官柳州  
州通判

馳封承德郎妻安人道光十八年二月二

十八日卒後十二年道光三十年六月二十九日安人  
卒合葬城東黃鶴泉之原子四人一清候選教諭一漣  
候補州同一儒候補訓導議敘鹽提舉銜一鳴湘陰縣  
學訓導孫某某訓導君循循有學行與之言識道理能  
辨析人事當否心疑其生長邊邑早宦何以能有此既  
究知其世家而後知君之成學而教家者遠也嵩齋嘗  
爲君父奉直公墓表於銘君墓不復詳其世次云銘曰  
君世業賈而以儒興研考禮經以就規繩人綱曷隳在  
喪道敝挈隤厲澆返依於制時有夷險道有汙隆尺寸  
權衡坦施以沖子子鄉間其效能幾又闕其文韜英斂

瑋吁嗟斯人而世莫知於後有延以昌其施

養知書屋文集卷二十一

湘陰郭嵩燾筠仙著

誥授榮祿大夫蕭公墓志銘

君諱韶字屺山一字光甫姓蕭氏清泉縣人自少讀書善深湛之思斂華就實不苟聲譽年三十三以選拔貢生與廷試高等授七品小京官籤分工部入貲爲員外郎改刑部中丁卯科舉人召試軍機章京又以高等入直君故才敏能官處機要益自敕密樞府大臣於君獨異視常最其列補直隸司員外郎轉安徽司郎中總辦秋審處兼充方略館協修截取記名繁缺知府

旋補福建道監察御史每有陳論審量民生國計求少  
裨助不以掎摭人過失爲直明年揀放廣州遺缺知府  
署督使者奏君才任繁鉅卽補廣州府知府故事任首  
會承宣上意使下喻其旨無同異督使者南皮張公負  
榦才尙氣諸曹推首受命唯諾喘汗無敢發言君獨亢  
聲陳說利病下令有不便輒引大體與爭或值盛怒引  
伏服謝而持益堅公久亦悟爲罷其議以是益倚任君  
其自治官事清理訟案整飭士習儲置積穀毅然任之  
要於成乃已三年士習其教民懷其惠值安南沿海之  
警軍興供億終以不乏而倉廩蓄積有餘擢湖北荆宜

施道督使者以粵事棘不宜失此夏佐密疏告畱調補  
惠潮嘉道旋署督糧道再署布政使司君以粵東積弊  
深理財用人端緒紛委簡料出入輕重之宜一準程式  
以自循守終署任莫干以私而信其所處公平無有怒  
者遷浙江按察使剔姦保民一持威嚴或疑君仁恕失  
其素守君曰是乃所以爲仁恕也浙民獷敝之習亦賴  
以稍戢擢江西布政使司會病行次金陵病益篤就邸  
舍逾數月卒君生於道光九年己丑歲某月日卒於光  
緒十有四年戊子歲某月日年六十曾祖緯儒祖正元  
父耀祖三世以君貴    贈榮祿大夫曾祖妣氏周祖

妣氏張妣氏蔣 贈一品夫人夫人廖氏繼夫人勞

氏子四人邦愷邦懌邦儔邦慎殤女五人長適候選員  
外郎長沙易秉次適監生衡陽劉興瀛次適戶部郎中  
舉人巴陵方朝榘四字湘鄉曾某五待字君平易謙退  
與人交輸寫心臆不爲城府篤於爲善艱難險阻處之  
若夷有族葬地二所兼患水蟻葬者百餘人並困苦不  
能自存君居母喪往視閔之改置平原高爽地盡遷之  
里鄰知其事始皆疑阻終乃大服生平克己守約不失  
權度部使者景東劉公治鹽釐難其人以君居憂力致  
之不爲應繼以文記私延君幕府又力辭曰是處貴而

無位高而無民之地指摘繁矣自湘陰左公不能免我何況焉君在官多偉節鄉里畸行於君末也要其磊磊大節所以自慰其踐履者一皆其志事之揚詡也嵩巖旣爲碑銘揭之墓道又掇其軼事於君初若不爲意而人見以爲難序而納之墓中而綴以銘其辭曰

年優矣而壽未備宦顯矣而功未遂翳夫人之爲德宜  
礪平一世開穹窿以建標偃雲雷而張幟晞古賢之  
宏濟曰道遠其焉至悼年歲之不淹揚鑑鼓而導志持  
一節以始終古今古而不敝

陳府君墓碑銘

江以西有隱君子曰陳琢如先生諱偉琳系出江州世所稱義門陳氏者也先世有仕閩者遂爲閩人祖鯤池由閩遷江西之義甯州再傳而生先生考克繩以孝義生子四人先生其季也始六七歲授章句已能通曉聖賢大旨端重簡默有成人之風及長得陽明王氏書讀之開發警敏窮探默證有如夙契曰爲學當如是矣奔馳夫富貴泛濫夫詞章今人之學者皆賊其心者也惟陽明氏有發聾振瞞之功於是刮去一切功名利達之見抗心古賢者追而躡之久之充然有以自得於心一試有司不應選決然舍去務以德化其鄉人尤相獎以

孝友其事父母竭力壹心承順顏色不言而曲盡其意  
母謝太淑人病亟夜馳二十里禱於神比反太淑人寐  
方覺言神餌我以藥疾以霍然先生以太淑人體羸多  
病究心醫家言窮極靈樞素問之精蘊遂以能醫名病  
者踵門求治望色切脈施診無倦自言無功德於鄉里  
而推吾母之施以及人亦吾所以自盡也生平爲學不  
求仕與名獨慷慨懷經世志嘗一涉江攬金陵之勝東  
厯淮徐涉略齊豫北至京師所至考攬山川校其戶口  
阨塞險易以推知古今因革之宜與其戰守得失之數  
方是時承平久天下晏然無兵革之憂而亂機牙擊隱

伏潛滋先生獨心憂之求思所以消弭之術欲因以識天下奇士人莫闕其涯際也及歸喟然曰士失教久矣自天下莫不然獨義甯也與哉誠欲興起人才必自學始於是倡建義甯書院爲賓興會資之赴舉曰非養無以成教凡有利濟無弗舉也有興創焉無弗先也已而粵寇陷武昌踞有江南數擾江西先生率鄉人團練擊賊比有功暇輒與講求忠義人皆喜自奮義甯以一城扼江楚之衝倚以拒賊者數年由先生治團練始也先生臨事必求實濟不憚勞不計名諸所以利人甚眾其卒也有男女二人伺其葬而哭諸墓則常以貧鬻妻爲

設方略保全之家人不知也先生豐頤廣穎嚴重有威而性樂易善啟發人揚人之善如弗及尤爲人士所親附武甯羅亨奎故奇士避亂義甯敬事先生曰亂離中能相處以道義此行爲得所師矣咸豐元年子寶箴舉於鄉益督以學戒無遽試禮部日取經史疑義相詰難及朱陸之學所以異同而言學須豫也脫仕宦虛疏無以應學又弗及悔何追矣病且革手錄李二曲答人問學書備論死生之故復書成德起自困窮敗身多因得志二語付寶箴庶幾神明貞固不亂者所著北游草松下談松下吟勸學淺語勸孝淺語通若干卷其於詩尤

長而不樂爲名故世亦莫能知府君生於某年月日卒  
於某年月日年五十有七配李淑人子三人樹年某官  
觀瑞殤寶箴辛亥科舉人以贊席寶田軍積功保道員  
留湖南候補加鹽運使銜女三人孫四人同治七年葬  
先生義甯之北隴又六年癸酉甃石加封以示後之人  
揭先生之行於墓命嵩壽爲之辭其銘曰

生世而爲賢必有先焉惟其運量周天下而學術之被  
其身足以有傳闔其光以禮之其子施世而長延先生  
之卒至於今二十年旣纂基而昌世迺伐石以表阡其  
名與行之不磨昭三光而奠九淵

鄧伯昭墓志銘

伯昭鄧氏諱瑤新化人父顯鵠諸生有學行世偁芸渠先生伯昭以父字亦字小芸其季父湘皋先生名尤盛與其兄悌友終身自湖以南言詩文宗鄧氏尤稱鄧氏家法爲不可及予始交伯昭及其季父子小皋京師而小皋之兄孟華實與偕後七年伯昭之弟小渠與予弟意城同舉於鄉以是得盡交鄧氏兄弟乙巳冬謁湘皋先生於所居南村草堂孟華已前卒小皋事其父甚孝而伯昭小渠所以事其叔者猶事父也退而兄弟相友愛甚敬以和又七年而湘皋先生卒小皋以毀死又四

年小渠亦死存者獨伯昭蓋予交鄧氏兄弟三十年盛衰生死之故多足感予心者伯昭以久故尤親又甚賢而能文於其卒也思之尤悲伯昭少能文湘皋先生廣交游章牘叢積伯昭年十八九常給筆札侍坐酬答自道光丁酉選貢京師旣試報罷遂以書記周厯湖南久之謁選得麻陽縣敎諭是時廣西寇亂萌孽其黨蔓延新甯反者數起寶慶知府長白魁聯思所以遏亂萌盡起郡人士賢者議方略檄畱君事以大辦於是人知君幹濟能任事矣赴麻陽任兩月丁母憂歸而粵寇起勞文毅公巡撫廣西邀君佐軍事湖南巡撫駱文忠公

以寶慶當廣西衝爲重鎮延君主講濂溪書院以圍防  
屬之咸豐九年粵寇圍寶慶君以守新化縣城功加鹽  
提舉銜又以辦理新化捐輸保知縣加運同銜今相國  
湘鄉曾公及駱文忠公數薦君可屬以事曾公請以知  
府擢用會江蘇請揀員遂以知縣揀發江蘇君方佐布  
政使江公於皖不赴官江公改四川布政使又從入蜀  
已而直隸總督劉公陝西巡撫劉公皆奏請君自隨而  
君浩然歸矣同治五年三月某日出峽至巴東舟覆死  
君性嚴介而退然自斂抑不露鋒穎與人和夷粹溫可  
愛而親而心肫肫然思有以利濟於人爲鄧氏族人立

社倉備荒在安徽積二十金謀製一狐裘慨然曰吾族  
社倉幸立無憂凍餒而家子弟貧者多苦不得就學吾  
此一裘之費可使生積供一二人讀書之資卽日封其  
金以告其宗人充學費焉守新化城釀金爲軍食事定  
計所餘千金君曰文武之用一張一弛賓興禮廢久矣  
請畱以助邑人之賓興者新化有賓興自君始居常以  
兄弟死亡相繼忽忽無歡悰與人言輒嗚咽而其叔母  
年八十獨健在君曲意承懽朝夕爲孺子慕以使豁其  
哀其自四川請告歸也曰吾叔母老吾不忍久違嗚呼  
是足以知鄧氏家法矣然而君賢遠哉君所爲詩文集

若干卷已刊行於世其他譏述甚繁予論次君之行實  
貽其從子光黼使碣諸墓亦以導予之悲銘曰

君之戚友曹炳文者夢君冠蓋紛紜不知其死也知有  
王勃之後身就而與語諱然以樸厚謹慎詒其家抑又  
何其殷勤天之於君若有意若無意吾將信之所聞惟  
其文章質行耿耿不可磨滅庶幾有攷於斯文

誥封資政大夫瞿君墓志銘

君諱元霖字仲蒼又字春階姓瞿氏晚號天逸老人先  
世自蘇州流徙湖南占籍爲善化人君少卓犖負志氣  
不甘下人兄弟讀書爲儒而食或不充父友某君習刑

家言語其家曰仲也才以治刑名之學其成必易必有名跡可賴以療貧君聞大戚自陳於父請卒讀貧賤富貴躬自致之不欲俯仰從人以咸豐辛亥 恩科舉於鄉援例爲主事籤分刑部四川清吏司君固敏於事又善服勞值庚申之變英吉利內犯京師曹司多避去君兼攝數司句稽案牘常至墳委退則閉戶讀書感憤時事倚鐙伏案強自排抑或竟夕不寢遂病眚久之乞歸歸十八年以疾卒君篤於故舊之誼解紛急難均其忻戚在京師鄉人游食者周其困旅殯者歸其喪嘗送其友櫬還歸而大雨急馳前視而柩已發卒達櫬所省

護以行間人一善道揚若已與有之人有過必咎責無少假亦若怨怒之切其身而終厚遇之不自以介意也工詩尤喜爲駢儼之文請者無虛日每有作侍史操筆翰誦其事狀君則閉目審聽澄思須臾朗誦微吟應其文之節抑揚高下若宿構然見者驚異君生於嘉慶十九年甲戌月日卒於光緒八年壬午月日年六十有九以子鴻禡所厯官封資政大夫祖諱運隆考諱岱兩世皆贈資政大夫妣皆夫人配殷氏封夫人子五人鴻勛兩淮候補鹽大使鴻錫運同銜分省補用知州鴻禡翰林院侍講學士其二殤女三人孫六人女孫六人以光

續九年葬善化八都安嘉壠之原嵩燾及見君父魯青  
先生儀容偉然善談論望而知其名德鉅人及與君兄  
弟石雲彤雲交好謂其家多才也必將有顯施於後殷  
夫人尤賢姻黨言婦德者交口推美之瞿氏之累積家  
庭間者蓋厚也君子子玖學士既貴顯學行文章高天  
下狀君行蹟求爲文以碣之墓其言可信嵩燾因序次  
而論之以著君之大節而綴以銘銘曰

人莫蹶於室而躋於天孰有翳其明孰有昌其傳曰此  
天之所命而惟其子之能賢嶽嶽君琦文瑰行一暝  
十八載於世無營何幽之弗喬何德之弗被不聲耀以

名不光大以事事則孔多名昭無窮有子承之以考君  
之終

陶益謙墓志銘

君諱鏡瑩字益謙安化陶氏故太子少保兩江總督文  
毅公之孫父少雲以蔭得官積軍資以道員就部選部  
書吏追論其試蔭逾期將責賂焉遂棄去終以不仕有  
子六人其四君也母爲今相國恪靖侯左公之女將誕  
君夢月夕數人若仙官挽一舟屋角鼓吹導引寤而生  
君自幼聰慧絕人嘗隨諸兄嬉庭下客有過者詔其諸  
兄曰明日夏也春盡今夕古詩人言之可舉似乎君應

聲曰未到曉鐘猶是春客問亦能誦詩耶曰未也聞兄誦之習也客大驚時方四齡也年十歲始學爲帖括之文發題命開講遲久未成就視則已盡一藝蓋雖少而志銳氣果不以所能讓人又十年補縣學生益發憤肆力於學學幾成矣以光緒八年六月病洩卒年二十五君有至性篤於孝友讀書博攬精取無泛無雜爲文章雄奇瑰麗馳驟往復以盡其變而性溫雅恂恂自下所交多名德長者無貴游子弟之好居室左右圖史自處如儒素將非循道守方受成於性者邪年之不遐成學之量之猶有未至則亦天道之適然或老壽以終或中

道殂落無繫其人之賢否也故曰人能宏道無如命何  
豈不然哉史稱黃憲言論無所傳聞徒以荀爽陳蕃郭  
林宗之徒交誦其賢其名至今稱焉而如所稱頽然其  
處順淵乎其似道雖其德量亦未有以名也君之譏述  
表見者多矣其於爲人深遠之量純篤之性固異於人  
獨世無荀淑陳蕃郭林宗者誦其賢而張大之古今人  
之不相若誠有宜然而士之生今之世不幸以早逝其  
尤可哀也夫君病革不能言以手詔家人進筆札處分  
後事甚悉中言立嗣以序則兄煌子紹曾以愛則兄覲  
儀子象曾因並立以爲嗣從遺屬也其遺文曰惜陰書

屋雜著並刊行之妻左氏生女三人光緒九年十一月初六日卜葬君安化一都賀家灣之原少雲以其長子煌述君行狀求志其墓雖予亦爲之感悼悲哽久而不能自克也稍次其生平大略而爲之銘銘曰

是夢月以生其卒也雨霽而月適明仙官衙衙旋舟於屋屋可舟卯曾不如澗瀆豈其生也有爲而奪於無年乘虛而遊控掉無前嗚呼物固有成毀銖黍之與較生才以爲世於世奚效吾將訊之巫咸叩穹蒼以告

翰林院編修譚君墓志銘

君諱鑫振字貢三一字麗生姓譚氏衡山人家故貧也

父以諸生就婚湘潭李氏遂依以居君少長於外家外  
大父湘山先生故舉人有學行君年十歲已畢十三經  
外大父深器之益資之讀又三年補郡學生其言論文  
章已自成立傑然有異於人長者見之皆驚歎以爲不  
及年二十四以優貢生考授教職又三年舉庚午科鄉  
試累署巴陵益陽縣學事以庚辰科進士廷試第三  
人授翰林院編修明年赴京師道卒浙江之杭州年三  
十有八君少有至性事父母怡顏下聲先意承迎癸酉  
趨就禮部試至山東病病且愈矣夢其母白衣促還君  
急起馳歸歸十日而父卒又數月而母亦卒言者謂君

歸爲動於孝若有默相之者焉始攝巴陵學以能訓士有聲學使者廖君壽恆保授國子監學正再攝益陽學會士民有嘵於縣聚數百人捶署門大闢君諭寢之無敢譁者再保知縣指發江西君爲人疏眉廣額俊爽有英氣而語和氣夷與人交曲折盡其意部使者王公文韶尤偉視君延之幕府中文翰盡決之君從人高下多懽洽無間嘗因大會賓客數十人君雅步趨踰拱揖道情故所不識輕重疏密各適體宜益生平練知人情而其才沛然肆應有餘亦以是自喜尤善李北海書法自湖以南無及者求請盈門無不立應其在浙江交益廣

名益盛嘗手振管而身與客周旋揖讓容相接而語相  
親也以是窮日夜不輟體故羸多病卒以勞啞血不止  
數日卒君生於道光二十四年甲辰十一月二十五日  
卒於光緒七年四月二十四日祖鵬高父大達皆贈奉  
政大夫妣皆宜人妻李氏子三人學苞學華學英女三  
人葬衡山橫過塘獅形山之陽旣卒逾年君弟振垚以  
狀來求表其墓吾聞君名十四年及得第以館後輩禮  
來見視其貌益癯而氣益斂以固憂其不能永年猶意  
其生之艱而得天之厚意固將以有爲邪孰知夫才者  
之不得所施以遽泯也君弟振垚述君狀尤悲而請之

尤勤其心意又有足哀者嗚呼君遂以吾文爲足傳君  
邪或君之所爲雖不多猶有足以傳者固將有意焉而  
用是以施顯於天下及今爲有望也

羅研生墓志銘

君諱汝懷字研生姓羅氏湘潭人自少讀書喜形聲訓  
詁之學求得顧汪戴段諸家之書精研力索曲暢旁通  
乾嘉之際經師輩出風動天下而湖以南闇然無知鄭  
許說文之學者君居石潭萬山中承其遺論獨以治經  
必先識字刲意潛思受成於心不假師資年三十四充  
丁酉科選拔貢生則君學已成矣所著書曰周易訓詁

大誼曰禹貢義箋曰毛詩古音疏證曰漢書溝洫志補注曰古今水道表曰十三經字原曰六書統考皆粗具其義例湘鄉曾文正公道州何子貞編修以爲有國朝經師之遺風君性和雅貌溫而氣愉與人交洞見肺腑久而益親言事嘗使意餘於詞婉約微至雜以諧笑尤以利濟民物爲心部使者駱文忠公議治團防得君團練芻說節取頒行以爲式其後陽湖惲公籌積穀德興李公申明鴉片煙之禁其端皆自君發之曾文正公視師江西召君君至曰吾任爲賓不受事選授芷江縣學訓導改選龍山縣學訓導皆不赴同治初 詔編

忠義錄襄錄死者君獨力任之先是新化鄧先生顯鶴輯沅湘耆舊集二百卷自唐以來湖南文獻可紀錄者探討靡遺又爲明季湖南殉節諸臣傳略以勸獎節義存鄉先達遺跡君曰永明之難湖南死節者爲多粵寇據有長江河南之寇徧及東豫而甘陝困於回逆兵師一出湖南死忠者倍焉國家方盛成功立名震耀天地而死者之節則一也至論湖南之文傳世者無多而要關繫一方掌故政治學術尤有以見厯代人文之盛而一鬱而不宣此吾事也於是輯湖南文徵一百卷襄忠錄八十四卷論者以湖南文獻之徵得鄧先生及

君存其梗概爲有功於鄉里之大者君嘗疾近世漢學  
宋學之分以爲名物度數先王所以立教而學必先識  
其大未可偏勝故其學於六藝故訓地理沿革古今山  
水源流厯代法制氏族金石篆隸靡不研通而一本於  
立身行己尤務獎厲後進以成學誘勉之惟恐不至薄  
技微長必求所以振拔之而自處一守以約菲言厚行  
不爲聲名言者謂通儒而行誼當世長者尤難能也君  
生於嘉慶九年甲子歲七月初四日卒於光緒六年庚  
辰歲九月三十日年七十有七曾祖晉祖紹龍考脩澍  
以孫萱官 贈通議大夫君兄弟五人於次爲三配

周淑人繼配陳淑人子六人萱以縣學生軍功道員殉難黜中以按察使例 賜卹贈騎都尉世職太常寺

卿周淑人出也克進軍功保知府加道銜分發江蘇陳淑人出蕡國子監生繁妾王氏出女三人孫八人君既卒就求其遺書蓋猶前四十年所見標具其所心得與先儒所以異同或多缺略無完書獨所著綠漪草堂文集三十四卷詩集二十卷研筆館詞三卷栞行於世克進葬君邑西龍家港粉壁山莊之原而述君行狀屬嵩燾爲之銘銘曰

湖湘以南有儒一生承經師之風以起而擷取其精著

書累數十萬言求之太廣而難於成其單辭贅義表見  
於世猶足以見君之生平千齡萬代以無隕其名

姚桂軒墓志銘

道光之季廣西寇發曾文正公起鄉里治兵所任爲將  
帥及轉餉數千里外多求沈練樸厚之才爲之於是湘  
人士風發雲涌貢其智能希尺寸之效出處隱見所成  
就異而其志趣一軌於正凡其所行更厯數十年守之  
爲成法反復更變無能易其度嵩壽始督餉益陽周壽  
山舉文任臣姚桂軒任其事於是始知有桂軒者也胡  
文忠公巡撫湖北召致之幕中日講論語精義證之行

事推見古人用心之當否以求有合書旨處以賓友之禮不以參佐視也繼又從巡撫嚴公廣西巡撫涂公主權務治軍幕始終以貢生例得訓導不求仕進晚一保中書凜然自以非所任終身以爲愧疚涂公以河南巡撫調湖南再畱君幕中君年且八十矣從涂公求題墓碑曰清故處士姚先生之墓亦君素志然也君諱紹崇字桂軒世爲益陽人祖逢年太學生考國字子三人而君居長家固饒也以家難糾紛君痛甚挈其弟讀書龍洲曰吾與若當自發名成業旣爲弟子員困於科舉則益刻己自勵曰士得志而功在人非可倖期也學與行

之在己者得志與否皆勉自盡焉莫吾阻也是以其讀書務綜實求當事理其出而任事竭誠以求濟盡所與賢否參差一約飭其躬不與人爲意氣人樂其和樂莫相疾怨者然終不敢干以私終其身舉止言笑皆有程度不失規矩尺寸所著書曰論語衍義十卷曰廣西志略十卷曰養正詩擬一卷曰子史撮言四卷曰墨筠軒詩集八卷惟論語衍義某行於世君生於嘉慶十年某月日卒於光緒十一年某月日年八十有一夫人譚氏事姑以孝聞先君四年卒葬所居之茅塘山子一教雯縣學生候選從九女一人孫三人曾孫二人教雯旣奉

君柩合葬茅塘山以嵩塗之習君也求爲之銘銘曰  
謂是隱淪而何奔走應舉之紛紜謂求仕者而終不與  
世爲羣嗚呼士固行其志耳君之志皭然自脫於埃氛  
其終以處士表墓庶徵信於吾文嗚呼姚君

誥授通奉大夫汪君墓志銘

君諱簠字鍊山姓汪氏世爲歙巨族明季曰然明者始  
遷杭之錢塘以文學主盟東南五傳曰上湖仍世能文  
科名仕宦相屬而上湖文益盛名益高是爲君高祖曾  
祖曰大任祖曰緒宜考曰科爵涖官江西蓮花廳同知  
生二子長曰範次卽君道光三十年蓮花君卒貧不能

歸柩又明年粵寇犯江西君奉母聞道走閩時年十六  
治生計養母母病割股和藥以進君旣才高習吏事剖  
決疑滯所至稱其能謂可試以政於是援例以通判分  
發湖南厯署清泉常甯衡陽知縣旋攝瀏陽縣事君以  
能聽訟治獄平亭疑法重於時州縣獄不能決輒假君  
鞫治君引獄辭窮端竟委辨知其情僞集兩造使各盡  
其辭伺間抵罅出一言折之皆輸心款服未嘗以擊斷  
爲能始至涖讞局斷獄稱最必得君訊治傅爰書案乃  
定凡在湖南十七年不離讞局始任清泉清泉有女子  
野斃體首不完窮治無端緒逮繫者眾語上聞巡撫於

君王公因曰非汪某莫辦檄君往代君廉知鄧元金者所事有連宜得其實一訊卽服於是歷年積案八百餘遂量其緩急輕重編次爲日程比年皆辦治邑無畱獄所至正士習嚴盜賊釐剔錢漕積弊務安民善俗遂其生計吏能大著光緒初 詔舉治行優異者兵部尙書彭公以君名應尙書籍衡陽與清泉同治一城知君治狀然是時君去衡陽蓋已數年也湘潭有盜連劫殺人邑令沈君坐縣差某差訴益急沈君持益堅檄君往勘沈君故能吏也盛氣視君君笑曰公領縣辨知良莠且讞已受成某何敢以異同要令無枉而已召差及受

盜者與令會訊盜實艤舟城下得贓皆入舟邑人多見之以疑似注射及差沈公亦太息自言此吾過也卽責差緝盜弛前讞不問以勞保知府加三品銜而訖不得一授實官君和夷溫雅粹然儒者出言必當於理與人交輸寫心意久而益親在官尤得民心推情與人不立崖岸而務杜絕私請寬而有別其吏能尤在聽訟下氣怡聲曲折以達其情未嘗有疾言遽色一時無及者體故羸也又善病或常乞告與病相守署衡陽任滿以父櫬在江西而母櫬寄闢外具貲足以營葬數千里歸櫬西湖並自畱生壙其旁曰吾終與父母相守幸矣存養

諸姊兄弟爲姊子入官援例竭貲爲之經營無所憚其先世厯有明德著書甚繁變亂咸燬於兵君搜輯得十餘種彙刻爲汪氏遺書書成未逾年君卒論者以是傷君之志而益悲君之無年君生於道光十七年丁酉七月十二日卒於光緒十四年二月初七日年五十有二夫人呂氏陽湖呂君炯之女妾范氏沈氏胡氏無子以從兄箴之子採爲嗣嵩壽識君晚而聞君治官事藉藉有聲因丁君次谷見君與之言怡然使人忘倦自述歲常奉委勘獄他郡縣憩旅舍聞其地有獄訟旁考博詢必窮極其始末至縣則問知其情與所聞絕異以是平

反甚眾其究心民事不以己所不與而有異視也嗚呼  
是眞良吏也已以卒之年十一月歸葬錢塘之普福嶺  
卽君所自治生壙也某具狀徵銘嗚呼如君者其可無

銘銘曰

官不酬其才年不逮其志於君爲可悲而尤悲者吏事  
天之生人其猶擣埴或圓或方或偏或粹君一融而治  
之惟所施而皆利嗟吾民之不幸訖未聞乎善治是峩  
峩者君之墳永冀表德於良吏

王子壽先生墓志銘

監利王子壽先生旣卒十有七年其孫傳喬以書告言

大父之喪諸父無存者傳喬年在童稚邑人以鄉賢請左文襄公又奏請史館立傳大父爲有傳矣而銘墓之文闕然未具傳喬生晚聞大父之生知交徧天下內外文章道義相接訖今無一存存者獨有先生傳喬念非先生無與銘大父之墓者敢以請嵩燾自少學爲文則知先生而讀其樞言上下篇以爲懷文抱質有道君子之言也先生長於嵩燾二十年是時年未逾四十文章已冠絕海內湖南北講論經史文藝必歸先生卽有所述造老師大儒皆咋伏莫敢與並先生亦自以其詩文啟誘後進才雋見人一技之長譽之不容口推轂而策

勵之必使有所興發以成其善容接故人子弟尤厚家無儋石儲其急人之憂嘗倍甚於憂其私以其道德文章獨步江漢間五十餘年然先生遠攬古今勤求時要日思所以振厲一世之人心而厝之安豈思以文士終哉其始通籍卽乞歸養嵩巖就詢其故喟然曰政敝民頑盜賊肆行承平日久惟務以法律束縛馳驟天下賢者無所用其能吾官卑濡忍二十年得一郡守自審無能爲不如歸而事親之歡也先生言治術必達民情言兵事必明地險心和而氣愉貌慈而言溫與人處無不輸心感服久而益相親也誠得假手以效其尺寸所施

必有過人者而自先生罷官歸學益光道益高其心泊然不以榮悴隱見易其守大帥如曾文正左文襄胡文忠諸公有事焉必就諮有謀焉必待斷而終不能以一官强使相就也嗚呼先生之於爲人可謂成矣孰使其志終不一發攄而天下言先生者徒歎嘵感慕其文章亦豈先生之心哉先生名柏心字子壽明季由江西豐城徙湘潭再徙監利居螺山曾祖秉道祖文模父有端並以先生貴贈封如其官道光癸卯科舉人甲辰科進士以主事籤分刑部夫人楊氏跏坐誦佛有解悟實不能文也年四十卒與先生合葬螺山之邁園子家遇荆

門州學訓導家隆候選通判家休監生孫傳喬傳綬傳  
治曾孫忠海忠訓忠誠忠禮先生生於嘉慶四年己未  
歲十月二十七日卒於同治十二年癸酉歲五月十三  
日所著書曰樞言曰導江三議曰漆室吟曰百柱堂詩  
通若干卷皆乘行未乘者子壽詩鈔六卷螺洲近稿六  
卷文集二十卷同治元年上經論言事八條由雲貴總  
督銅山張公代進奉    旨褒獎詳家傳及所刊鄉賢  
錄嵩臺爲具先生之學行犖犖大者揭之於墓昭示來  
哲而繫之銘銘曰

其生先我二紀相望後我七年乃貢於鄉名聲夙馳通

籍蓋晚浮湛郎署任薄道遠溢然南歸播揚馨芬昂霄躡景大露於文莘莘學徒門闈戶溢淪而通之道其涇塞大湖南北物望斯歸孕包眾能甯受輕穢自致其名泰山北斗仕則匪豐其施孔厚

贈光祿大夫陳府君墓志銘

府君諱維之字伊人姓陳氏桂陽州人曾祖某祖某父某積德累世無聲於時君生五年卽喪其父逾年又喪其母議婚州之尹氏妻父以學行聞遂從受學通易禮春秋旁及文選爲文章必澤於古連試扼於有司歎曰吾道求之已而已於時無所用不足以干時遂不復試

課其子自始學至於有立成教庭戶之間未嘗就外傳  
性方嚴於人無假借苟有過雖小出入必盡規苟爲不  
肖見則引去雖貴盛屏立不交一語嘗與同學十餘人  
俱暑夜謀摘取田中瓜爲歡飲戒俟君寢乃出啟戶聞  
噦聲卽斂退無敢闖扉使有聞其見憚如此然其爲人  
仁厚有至性遇賓親尤有恩鄰里假貸及遠親至愈貧  
事之愈恭工醫濟人醫藥施舍無虛日宗族子姓飢寒  
疾病常若痛苦之在其身日夕營營必遂所求乃已晚  
年道益充氣愈和務斂抑自同於人然終無敢干以私  
者尤自喜能知人一日有叩門入者爲某親求方藥君

曰此察其神色非善所以來求食耳某親賢者必不屬  
以事其後詢之果然又或充書吏方有急來言所謀君  
笑曰若此言良是然察其意非能急人之急命具酒食  
餉之曰此足以酬君意矣言者謂君終身不受人欺而  
其辭趣亦莫能怨焉君生於某年月日卒於某年月日  
年六十有五子士元增生士杰己酉科拔貢生授戶部  
小京官累功官山東巡撫所謂雋臣中丞者也女四人  
孫十二人兆文某科進士翰林院編修兆蓉壬午科舉  
人兆璜兆槐兆棻兆泉兆葵某科進士翰林院編修兆  
蘭兆熊兆雲兆璇女孫十二人以某年月日葬州東申

家衝越二十一年夫人卒合葬牛坳嶺夫人生於某年  
月日葬於某年月日賢明有法能卒成其夫之德佑啟  
其子孫其卒既葬十五年以書命嵩燾曰先人展轉營  
葬而未有志敢請志之稍敘次其官閥納之壙中事皆  
可傳載始雋臣佐曾文正公軍幕嵩燾與焉文正公名  
能知人獨謂雋臣有識鑒所部文武吏士始至必先令  
詣雋臣陰使相其能否因授以事嘗疑雋臣生鄉里一  
至京師得官滯遲若此乃能治事論人奇中以爲異及  
聞府君之事而信雋臣之賢能所至立名蹟得之家教  
多也乃爲銘曰

其生藐孤艱貞自幼疇覆翼之綢繆婚媾卓立嶷嶷翹  
英擢秀終闢其施以詒厥後一傳而顯節鉞封折諸孫  
翩翔如驂有駢詞臣世榮載燁其輝發基郎署在目猶  
睇厯三十年天授宏造始表斯阡用彰述紹鴻光比德  
後先同兆吾銘其藏於後有考